

## Ukun rasik an, dezvoltimentu no prosesu harii paz Indijena iha Timor-Leste

Sophia Close

### Peskiza nia objetivu

Agora dadaun iha mundu tomak eziste povu Indijena liu millaun 370. Tanba aktivismu internasionál durante tinan naruk mak Nasoens Unidas aprova tiha ona Deklarasaun kona-ba Direitu Povu Indijena ne'ebé aprova husi Assembleia Jerál iha 2007. Deklarasaun ida ne'e rekoñese povu Indijena ninia direitu ba ukun rasik an hanesan parte ida husi ema hotu-hotu ninia direitu atu kontrola rasik nia dezvoltimentu ekonomiku, sosiál no kulturál. Deklarasaun ida ne'e hateten katak dezvoltimentu nu'udar dalan ida hodi implementa direitu ida ne'e ho paz no sustentabilidade.

Agora dadaun iha mundu tomak ita gasta osan billaun ba billaun ba intervensaun dezvoltimentu ba nasaun sira ne'ebé seidak dezvoltividu. Maske nune'e intervensaun hirak ne'e seidak atinje sira nia rezultadu. Peskidór barak, inklui husi Easterly (2006), Kothari no Minogue (2002), Moyo (2009), Rihani (2002), Ramalingam (2013), Sen (1999) halo mos peskiza kona-ba prosesu dezvoltimentu ne'ebé la efektivu. Seluk tan, hanesan Anderson (1999), Collier (2007), Chand no Coffman (2008), Richmond (2005; 2015), Westoby no Dowling (2009) mós hateten katak iha ligasaun entre dezvoltimentu ne'ebé la efektivu no kresimentu violénsia no konfliktu iha mundu. Hau nia peskiza investiga asuntu hirak ne'e iha Timor-Leste.

Maske ema Timor-Leste la dun uza linguajen 'Indijena' hodi identifika-an peskidór lubuk ida, hanesan Babo-Soares (2004), Cabral (2002), da Silva (2012), Trindade (2008, 2013), Ospina no Hohe (2002) no Tobias (2012) hateten katak iha duni ligasaun entre ema Timor-Leste ninia esperiénsia luta no konseitu 'Indijena'. Tuir hau nia peskiza rasik mos hateten katak ita bele haree katak konseitu Indijena eziste duni iha Timor-Leste tanba ita bele haree sistema matenek lokál ne'ebé forte tebes no mós tanba kategoria Indijena hotu ne'ebé Nasoens Unidas identifika bele mós aplika ba povu Timor-Leste. Hau nia peskiza hatudu katak konseitu Indijena fó dalan ida hodi ita bele komprende di'ak liu tan asuntu ukun rasik an no violénsia iha Timor-Leste.

Timor-Leste nu'udar sosiedade Indijena ida ne'ebé fragil no foin husik konfliktu. Timor-Leste iha istória kolonializmu, konfliktu no violénsia ne'ebé naruk tebes. Dezde votasaun ba ukun rasik an iha tinan 1999 (ne'ebé suporta husi Nasoens Unidas) nasaun Timor-Leste hetan mós impaktu husi projetu dezvoltimentu oin-oin. Projetu hirak ne'e iha impaktu oin-oin ba nasaun Timor-Leste, impaktu balu ne'ebé di'ak no balu ne'ebé la dun di'ak. Tuir La'o Hamutuk (2010:10) katak husi tinan 1999 to'o iha tinan 2009 Timor-Leste simu osan maizumenus US billaun \$5.2 husi ajensia dezvoltimentu internasionál. Maske simu osan to'o billaun \$5.2 tuir La'o Hamutuk katak so 10% mak konsege to'o iha Timor-Leste ninia ekonomia rasik. Durante tinan hirak ne'e indikadór sira ba saúde, edukasaun, infrastrutura no governasaun aumenta neinek maibé iha tinan 2013 populasaun 38.7% hela nafatin iha pobreza laran (UNDP, 2013). Hau nia peskiza ninia objetivu hodi komprende di'ak liu tan oinsá sistema dezvoltimentu husi rai li'ur ne'ebé agora implementa hela iha Timor-Leste impaktu ba ukun rasik an Indijena Timor-Leste nian.

### Metodolojia

Husi tinan 2006 to'o iha 2010 hau servisu hamutuk ho programa Australian Aid (AusAid) iha Timor-Leste. Husi tinan 2009 to'o iha 2013 hau halo peskiza ba hau nia PhD. Hau nia peskiza hakarak fó kontribuisaun ba area dezvoltimentu no area harii paz liu husi análise Teoria Kritika Indijena. Hau nia peskiza mós bazeia ba peskiza ne'ebé halo husi Babo-Soares (2004), da Silva (2012) no Trindade (2008; 2013) no hakarak atu haree oinsa sistema matenek lokál Timor-Leste ninia ligasaun ba konfliktu no dezvoltimentu. Hau mós rekoñese peskidór Alfred (1999), Garrouette (2003), Nakata (2007) no Smith (1999) ne'ebé ajuda hodi hakle'an no esplika diak liu tan matenek Indijena nian.

Hodi hala'o peskiza ida ne'e hau rona istoria husi partisipante hamutuk 90. Partisipante kompostu husi ema Timoroan no mós ema internasionál ne'ebé servisu iha setór dezvoltimentu nian iha Timor-Leste. Hau uza prosesu análise 'abductive' hodi análise dados kualitativa no hodi harii hau

nia teoria, signífika katak hau nia teoria bazeia ba observa kedas kontextu Timor no liafuan ne'ebé partisipante sira fô mai hau. Iha prosesu hakerek hau uza liafuan barak no citacao husi partisipante sira hodi lee nain sira bele liga direktamente ho istória partisipante sira.

## **Analyza**

Konflitu nu'udar buat ida ne'ebé dala ruma pozitivu no fô dalan ba sosiedade no ema ida-idak hodi muda nia moris. Hau uza teoria husi peskizadór ida naran Galtung (1969; 1990) nune'e hau nia peskiza mós rekoñese katak 'konflitu' no 'violénsia' hanesan buat rua ne'ebé la hanesan. Galtung esplika katak violénsia nu'udar ita nia hahalok fiziku, psikolójiku no verbal. Violénsia estruturál nu'udar prosesu indiretu ida ne'ebé akontese tanba inegualdade. Violénsia kulturál hanesan parte kultura ne'ebé uza hodi justífika ka lejítima violénsia estruturál ne'e. Violénsia direta, violénsia estruturál no violénsia kulturál eziste barak iha comunidade Indíjiena Timor-Leste nia let tanba istória kolonializmu no tanba konkorrénsia ba podér no rekursus. Hau konkorda ho peskizadór Alfred (1999) no Turner (2006) katak violénsia hirak ne'e hamenus ukun rasik an no dezvoltimentu Indíjiena.

Hau hala'o análize konflitu no paz ida ne'ebé kle'an no fokus ba periodu 1999 to' o agora. Liu husi análize ida ne'e hau haree katak inegualdade podér ne'ebe eziste nanis ona no haburas tan husi kolonialista Portugés no okupasaun Indonesia sai nu'udar abut ba konflitu barak ne'ebé agora eziste hela iha Timor-Leste. Ida ne'e hamosu relasaun moruk liu entre ema élite sira, sira nia apoiante no grupu, no mos povu Timor-Leste. Hau nia peskiza hatudu katak eziste hela problema barak ne'ebé bele hamosu violénsia inklui mos: pobreza; problema setór seguransa; problema rai, propriedade no nain ba rekursus; governasaun ne'ebé fraku no susar ba povu atu asesu; korrupsaun; diferensia polítiku entre élite no povu ki'ik sira; violasaun direitus umanus ne'ebé kontinua hela; menus seguransa ai-han no soberania ai-han; sistema justisa ne'ebé fraku; impunidade ba krime pasadu nian; menus seguransa ekonomia, dezempregadu barak; dependénsia maka'as ba setór petróleu no infrastrutura ne'ebé la to'o.

Hau nia peskiza hatudu katak povu Timor-Leste iha sistema matenek Indíjiena ne'ebé forte tebe-tebes no katak sistema hirak ne'e liga ba rai, família no ritual lisan ne'ebé halo hela. Sistema matenek indíjiena eziste nafatin durante tempu kolonializmu no okupasaun. Dala barak sistema matenek indíjiena foti no inklui konseitu balu husi ema li'ur no adapta konseitu foun ne'e tuir sira nia lisan rasik. Sistema Indíjiena sira bele eziste hamutuk ho sistema modernu maibé kuandu laiha balansu entaun bele mosu violénsia. Prátika harii pas indíjiena hanesan tara bandu, nahe biti no juramentu uza iha comunidade barak hodi muda konflitu. Prátika hirak ne'e hanesan prátika ne'e baratu, fasil atu asesu no fleksível liu duke sistema modernu sira. Maibe iha parte seluk prátika indíjiena sira presiza mos suporta husi grupu élite sira, rekursus, regulasaun apropriadu no edukasaun hodi nune'e bele la'o ho diak.

## **Rezultadu Peskiza**

Bazeia ba esperiénsia ema Timor-Leste hau nia peskiza hatudu katak sistema dezvoltimentu ne'ebé ita uza hela hamosu violénsia structural iha comunidade Indíjiena nia let tanba la fô valór no la hakbiit sistema matenek Indíjiena ka prátika harii paz lokal. Hau nia peskiza fô dalan oinsá dezvoltimentu internasionál bele muda ninia hahalok hodi fasilita ukun rasik an indíjiena iha Timor-Leste. Análize ida nee fokus ba kauza abut violénsia iha Timor-Leste liu husi haree kle'an kultura, podér no relasaun ema nian.

## **Perspetiva Timoroan ne'ebé servisu iha setór dezvoltimentu**

*Kultura:* Partisipante Timoroan barak esplika katak matenek no kultura Indíjiena agora uza hela iha Timor-Leste. Ema Timor ho nia identidade oin-oin. Partisipante sira hateten katak iha sentimentu fahe malu entre comunidade no katak ida ne'e so bele hadi'a liu husi prosesu harii identidade nasional liu husi diskusaun kolektivu. Maioria partisipante fô valór boot ba rai nu'udar buat ida ne'ebé sagradu no hateten katak rai importante tebes ba identidade, kria relasaun ba malu no sentimentu 'nain'. Sira hateten katak menus asesu ba rai kulturál nu'udar buat ida ne'ebé bele hamosu violénsia iha comunidade barak no hanesan mós problema ida ne'ebé bele impaktu negativu tebes ba dezvoltimentu bazeia ba ukun rasik an no soberania ai-han.

Partisipante barak hatutan katak política linguajen nasional ne'ebé komplikadu, no polítiku tebes halo diskriminasaun ida ba Timoroan kiak ne'ebé laiha edukasaun. Wainhira la uza no haburas tan

lingua Indijena bele hakle'an tan inegualdade iha rai laran no bele hakbiit grupu balu liu fali grupu seluk. Tanba laiha linguajen ne'ebe hanesan entre sira, grupu elite sira no ema internasionál ne'ebé servisu iha setór desenvolvimento sei kontinua hodi foti desizaun ne'ebé la partisipativa no desizaun ne'ebé la livre no la bazeia ba informasaun dahuluk (free, prior and informed consent).

*Kbiit:* Abut ba sistema matenek Indijena Timor-Leste nian mak prosesu ida hodi halo balansu ba kbiit ka podér. Partisipante barak hateten katak tanba podér ka kbiit ne'ebé laiha balansu no mós konfliktu ne'ebé uluk la resolve mak hamosu fali krize 2006. Tuir sira nia haree ita presiza resolve uluk inegualdade mak foin bele muda tiha kauza abut violénsia. Durante tempu Portugés no tempu Indonesia kbiit boot no podér atu foti desizaun rai hela iha ema estranjeiru nia liman. Kolónialista sira hakbesik an ba ema elite rai laran ne'ebé mós hakarak lori sistema matenek modernu domina fali sistema matenek Indijena. Ohin loron prosesu foti desizaun iha Timor-Leste nafatin prosesu ida ne'ebé 'husi leten deit' (top-down), prosesu patriarkal no prosesu bazeia ba desizaun iha Dili. Situasaun ida ne'e kria divizaun entre sidadaun baibain no ema elite sira. Situasaun ida ne'e la fó valór ba matenek no kapasidade Timor-Leste nian, hatún comunidade nia lian no haburas tan violénsia estruturál.

Inegualdade relasaun entre mane no feto mós hamosu tan violénsia estruturál no violénsia direta iha Timor-Leste. Inegualdade entre mane no feto kompleksu tanba sistema indijena no sistema modernu hasoru malu. Foin mak ita respeitu matenek Indijena Timor-Leste no mós respeitu igualdade jéneru mak mane no feto bele partisipa ativu iha prosesu foti desizaun. Husi partisipante sira mós identifika katak la'os deit korrupsaun ekonomiku ne'ebe sai hanesan abut ida ba inegualdade maibe korupsaun moral mós nu'udar problema bo'ot ida. Partisipante hatutan katak edukasaun ne'ebé inklusivu iha ligasaun ba polítika linguajen nasional, prosesu hakbiit kapasidade ne'ebé sustentável no ba prosesu Timoroan sai nain ba desenvolvimento. Sira esplika katak agora dadaun sistema edukasaun hatutan tan violénsia estruturál no halo marjinalizasaun ba feto rural no ema kiak.

*Relasaun:* Kolonializmu Portugés no okupasaun Indonesia ne'ebé akontese tinan naruk husik hela problema sosial ne'ebé kle'an, comunidade ne'ebé trauma no menus fiar malu. Konfliktu ne'ebé la resolve, no relasaun fraku ho ema internasionál ne'ebé servisu iha setór desenvolvimento nian sai hanesan kauza ida ba violénsia no mós bareira ida ba desenvolvimento efetivu. Duplikasaun servisu tanba laiha kooperasaun di'ak no relasaun ne'ebé fraku halakon rekursus no kometimentu comunidade desenvolvimento nian. Partisipante sira hateten katak fiar malu, sai nain no servisu hamutuk mak prinsipiu hirak ne'ebe importante tebes. Prosesu harii relasaun no kooperasaun di'ak iha abut kulturál ne'ebe naruk no bele mos fó benefísiu no kria ligasaun di'ak ba jersaun futuru.

Kuandu ko'alia ona kona-ba asuntu kapasidade iha diferensia bo'ot entre perspetiva partisipante Timoroan no perspetiva partisipante internasionál sira. Partisipante Timoroan hateten katak sira iha rasik kapasidade bo'ot hodi halo mudansa. Ida ne'e diferente tebes husi perspetiva ema internasionál sira ne'ebé barak liu negativu no haree katak kapasidade la dun barak. Ema Timoroan ida ne'ebé servisu iha setór desenvolvimento hateten 'sira hatún ami nia kapasidade lokál, ami nia matenek lokál no ami nia esperiénsia lokál. Sira hamoe ita povu Timor, ita nia kultura no ita nia identidade.'

Konsultasaun no planeamentu ne'ebé ikus liu la rezulta iha desenvolvimento ruma bele hasai comunidade ninia expetativa no bele halo comunidade sira frustradu. Partisipante sira hateten katak desenvolvimento iha Timor-Leste la produtivu tanba prosesu la apár ho kontektu Timor no la bazeia ba prosesu no oráriu ne'ebé realístiku. Partisipante sira haree katak ida ne'e sai hanesan asuntu sistemátiku no katak desenvolvimento efetivu tenke bazeia ba fleksibilidade no tempu naruk. Partisipante fo sujestaun katak di'ak liu uza pratika lisan ne'ebé bele liga ema laran (Timoroan) ba ema li'ur (ema internasionál sira) hodi bele harii relasaun forte, jere mudansa no hamenus konfliktu entre sistema matenek diferente no pratika kulturál ne'ebé la hanesan.

### **Perspetiva ema internasionál servisu iha setór desenvolvimento**

*Kultura:* Iha jerál partisipante internasionál sira foti asuntu hanesan mos partisipante Timoroan sira so sira nia perspetiva mak diferente tebes. Ema internasionál ne'ebé servisu iha setór desenvolvimento hateten katak sira dala-barak la liga ho sistema matenek, kultura no identidade Timoroan nian. Partisipante balu hatudu sira nia frustrasaun tamba iha nivel sociedade no identidade oin-oin ne'ebe kompleksu no hateten katak todan ba sira hodi haree no komprende didiak kultura Timor nian. Sira rekoñese katak atividade ka programa ne'ebé hatún ka representa bosok kultura sai hanesan risku no bele hamosu tan violénsia no katak presiza fleksibilidade no tempu naruk hodi bele komprende malu.

*Kbiit no Podér:* Maske ema internasionál ne'ebé servisu iha setór dezentvolvimentu haree Timoroan nia kapasidade hanesan menus liu sira hateten katak intervensaun ka programa ne'ebé hala'ó durante tempu badak la bele hafórsa kapasidade no katak partisipasaun ativu husi comunidade no tempu naruk mak fundamental ba mudansa sustentável. Sira rekoñese katak sistema dezentvolvimentu ne'ebé kompleksu no prosesu ne'ebé la fleksível hatún comunidade ninia kapasidade atu involve-an iha prosesu dezentvolvimentu. Ema internasionál ne'ebé servisu iha setór dezentvolvimentu nian mós hateten katak inegualdade jéneru, korrupsaun no prosesu foti desizaun ne'ebé sentralizadu tebes mós impaktu ba prosesu hatutan servicos ba povu, haburas violénsia estruturál no limite rezultadu dezentvolvimentu.

Partisipante internasionál barak hateten katak tanba kbiit boot hodi foti desizaun rai iha ema élite sira no ema internasionál sira nia liman mak bele haburas liu tan inegualdade no violénsia estruturál. Ema internasionál ida ne'ebé servisu iha setór dezentvolvimentu esplika tuirmai: 'Mai hau, relasaun entre ema mak importante liu. Relasaun nia funsaun mak hodi halo mudansa ba inegualdade podér ne'ebé agora eziste hela'. Konkordánsia ka akordu ne'ebé livre no bazeia ba informasaun sedu (free, prior and informed consent) hanesan dalan ida hodi halo balansu ba podér maibé ema internasionál ne'ebé servisu iha setór dezentvolvimentu identifika bareira barak ba implementasaun konseitu ida ne'e. Ema internasionál dala barak servisu hamutuk ho ema élite sira tanba fasil atu komunika no foti desizaun no tanba comunidade dook no iha kapasidade ne'ebé la to'ó.

*Relasaun entre ema:* Partisipante internasionál barak hare'e sira nia servisu fatin hanesan fatin ne'ebé kompetitivu tebes no fatin ne'ebé la fasilita kooperasaun di'ak no la fasilita sira atu atinje alvu dezentvolvimentu sustentável konjuntu. Sira senti relasaun ba malu hanesan relasaun kontra malu mak barak. Partisipante internasionál ne'ebé servisu iha setór dezentvolvimentu barak rekoñese katak sira presiza hadia sira nia saúde psikolójiku rasik mak foin bele mai hodi servisu iha ambiente kompleksu ne'ebe foin husik konfliktu. Sira mos rekoñese katak presiza harii fatin seguru no inklusivu hodi comunidade bele partisipa ativu iha diálogu konjunktú hodi muda no hamenus konfliktu.

Tabela ida ne'e hanesan sumáriu badak ba rekomendasaun sira husi Timoroan no ema internasionál ne'ebé servisu iha setór dezentvolvimentu hodi oinsá ita presiza muda sistema dezentvolvimentu agora nian

<b>Ema Timoroan ne'ebé servisu iha Setór Dezentvolvimentu</b>	<b>Ema International ne'ebé servisu iha Setór Dezentvolvimentu</b>
<b>Kultura</b>	<b>Kultura</b>
<i>Rekoñese no fó valór ba sistema matenek Indijena kompleksu</i>	<i>Komprende dinámika konfliktu ne'ebé eziste agora dadaun no uza prosesu harii paz Indijena nian</i>
<i>Rekonese katak identidade oin-oin eziste iha Timor-Leste no katak identidade ne'e liga ho area lokal</i>	<i>Selebra no kria ligasaun ho identidade oin-oin</i>
<i>Uza no fahe lingua lokal</i>	<i>Hasai sistema to'ó no la fleksível</i>
<i>Rekoñese no fó prioridade ba ligasaun ba rai no fatin</i>	<i>Aprende lingua lokál no fó prioridade ba edukasaun inklusivu</i>
	<i>Respeitu ema nia ligasaun ba rai</i>
<b>Kbiit no Poder</b>	<b>Kbiit no Poder</b>
<i>Rekoñese katak wainhira laiha balansu entre sistema governasaun indijena no sistema governasaun modernu katak iha ne'e hamosu violénsia estruturál</i>	<i>Kapasitasaun institusionál dala barak haburas liu tan violénsia estruturál</i>
<i>Dependencia nu'udar tipu violénsia estruturál</i>	<i>Tenke halo balansu ba muda inegualdade kbiit ne'ebé agora eziste</i>

<i>Igualdade nu'udar objetivu ida ne'ebé fundamental ba dezenvolvimentu inklusivu</i>	<i>Tenke implementa no legitimisa konkordánsia ne'ebé livre no bazeia ba informasaun sedu</i>
<i>Korrupsaun bele eziste liga ho ekonomia no mós liga ba moralidade</i>	<i>Tenke desentraliza kbiit no podér</i>
<i>Edukasaun bele suporta prosesu foti desizaun inklusivu</i>	<i>Inegualdade jéneru mós haburas tan tanba inegualdade jerál</i>
	<i>Tenki fasilita oinsá Timoroan sai nain ba dezenvolvimentu</i>
<b>Relasaun</b>	<b>Relasaun</b>
<i>Tenke iha prosesu hasai kapasidade ne'ebé sustentável</i>	<i>Tenke rekoñese no servisu hamutuk ho kapasidade lokál</i>
<i>Tenke hadi'a no kura trauma individual</i>	<i>Tenke harii fatin servisu ne'ebé la kompetitivu</i>
<i>Tenke iha konsultasaun ativu no partisipasaun ba ema hotu</i>	<i>Relasaun di'ak no saudavel individual importante tebes</i>
<i>Oráriu no tempu tenke nato'on ba comunidade</i>	<i>Presiza partisipasaun ativu</i>
<i>Presiza haburas tan ligasaun entre ema laran no ema liur hodi harii no sustenta ligasaun forte</i>	<i>Tenke fó kometimentu ba longu prazu hodi bele promove no asegura sustentabilidade</i>
<i>Tenke servisu ho kontektu Timor</i>	

### **Konkluzan no Importánsia husi Peskiza ida ne'e:**

Peskiza ida ne'e la hateten katak iha ligasaun entre violénsia hotu-hotu ne'ebé akontese iha comunidade Indijena Timor-Leste nia laran no intervensaun dezenvolvimentu. Maske nune'e peskiza ida ne'e hatudu katak iha fallansu bo'ot rua iha sistema dezenvolvimentu ne'ebe agora dadaun implementa hela iha Timor-Leste. Fallansu primeiru katak sistema dezenvolvimentu agora la fó valór no la hakbiit sistema matenek Indijena Timor-Leste nian. Fallansu segundu katak prosesu dezenvolvimentu ne'ebé agora aplika iha Timor-Leste aumenta violénsia estruturál iha Timor. Sistema harii paz indijena dala barak la hetan uza hodi muda violénsia ida ne'e no dala barak kauza abut ba konfliktu ne'ebé la hetan rezolusaun prevene comunidade hodi atinje ukun rasik an indijena.

Hanesan mos peskizadór Meadows (2008), Rihani (2002) no Ramalingam (2013) hau nia peskiza mós hatudu katak sistema dezenvolvimentu ne'ebé implementa agora dadaun falha tanba aplika hela modelu mekániku no simples ba mundu ne'ebé kompleksu tebes no la tuir liña ida deit. Tuir hau nia haree katak presiza iha mudansa fundamental ba ita nia teoria no pratika dezenvolvimentu. Prosesu dezenvolvimentu tenke muda an hodi servisu hamutuk ho sistema matenek Indijena sira hodi buka solusaun integradu no kompleksu ne'ebé bazeia ba kontektu ida-idak. Presiza mós katak ita bazeia fali servisu ida ne'e ba kultura, podér no relasaun entre ema. Sistema ukun rasik an Indijena tenki bazeia ba prosesu foti desizaun ne'ebé livre no bazeia ba informasaun dahuluk (free, prior and informed consent). Hodi la'o ba oin ema indijena rasik mak tenki kaer no sai nain ba prosesu dezenvolvimentu hirak ne'e no tenki uza rasik sira nia prosesu harii paz Indijena nian hodi transforma konfliktu.

## Referensi

- Alfred, T. 1999, *Peace power righteousness: an indigenous manifesto*, Oxford University Press, Ontario.
- Anderson, M. B. 1999, *Do no harm: how aid can support peace - or war*, Lynne Rienner, Boulder.
- Babo-Soares, D. 2004, 'Nahe Biti: the philosophy and process of grassroots reconciliation (and justice) in East Timor', *The Asia Pacific Journal of Anthropology* 5(1): 15 - 33.
- Cabral, E. 2002, *FRETILIN and the struggle for independence in East Timor 1974-2002*. Unpublished Ph.D Thesis, Lancaster University, Lancaster U.K.
- Chand, S. and Coffman, R. 2008, 'How soon can donors exit from post-conflict states?' Centre for Global Development Working Paper Number 141 (February 2008): 53.
- Collier, P. 2007, *The bottom billion: why the poorest countries are failing and what can be done about it*, Oxford University Press, New York.
- da Silva, A. 2012, 'FRETILIN Popular Education 1973-1978 and its Relevance to Timor-Leste Today', Unpublished PhD Thesis, University of New England.
- Easterly, W. 2006, *The white man's burden*, The Penguin Press, New York.
- Galtung, J. 1969, 'Violence, peace and peace research', *Journal of Peace Research* 6(3): 167-191.
- 1990, 'Cultural violence', *Journal of Peace Research* 27(3): 291-305.
- Garroutte, E. 2003, *Real Indians: identity and the survival of Native America*, University of California, Berkley.
- Kothari, U. and Minogue, M. (eds) 2002, *Development theory and practice: critical perspectives*, Palgrave, UK.
- La'o Hamutuk 2010, 'Land justice in Timor-Leste', *The La'o Hamutuk Bulletin*, no. 11, La'o Hamutuk, Dili.
- Meadows, D. 2008, *Thinking in systems: a primer*, Chelsea Green Publishing, White River Junction, Vermont.
- Moyo, D. 2009, *Dead aid: why aid is not working and how there is another way for Africa*, Allen Lane, London.
- Nakata, M. 2007, *Disciplining the savages: Savaging the disciplines*, Aboriginal Studies Press, Canberra.
- Ospina, S. and T. Hohe 2002, *Traditional power structures and local governance in East Timor: A case study of the Community Empowerment Project (CEP)*. Geneva, Graduate Institute of Development Studies.
- Ramalingam, B. 2013, *Aid on the edge of chaos: rethinking international co-operation in a complex world*, Oxford University Press, Oxford.
- Richmond, O. 2005, *The transformation of peace*, Palgrave, New York.
- 2015, 'The dilemmas of a hybrid peace: Negative or positive?', *Cooperation and Conflict* 50(1): 50-68.
- Rihani, S. 2002, *Complex systems theory and development practice: understanding non-linear realities*, Zed Books, London.
- Sen, A. 2009, *The idea of justice*, Harvard University Press, Cambridge.
- Smith, L. 1999, *Decolonizing methodologies: Research and Indigenous people*, Zed Books, New York.
- Tobias, P. 2012, 'Maintaining a civic nation', in M. Leach et al. (eds) *New Research on Timor-Leste*, Timor-Leste Studies Association, Swinburne University Press, Hawthorn, pp. 330-335.
- Trindade, J. 2008, 'An ideal state for East Timor: reconciling the conflicting paradigms', [http://www.indopubs.com/An\\_Ideal\\_State\\_for\\_East\\_Timor.pdf](http://www.indopubs.com/An_Ideal_State_for_East_Timor.pdf).
- 2013, 'Matak-malirin, tempu rai-diak no halerik: expressions of what timorese longed-for, fought-for and died-for', in H. Loney et al. (eds) *Understanding Timor-Leste 2013*, Timor-Leste Studies Association, Swinburne University Press, Hawthorn, pp. 55-59.
- Turner, D. 2006, *This is not a peace pipe: towards a critical indigenous philosophy*, University of Toronto Press, Toronto.
- UNDP 2013, *Human Development Report 2013: Human Progress in a Diverse World*, UNDP, New York.
- Westoby, P. and Dowling, G. 2009, *Dialogical community development: with depth, hospitality and solidarity*, Tafina Press, Brisbane and London.